

Prezidente

**MENSAJEN TELEVIZIVA HOSI PREZIDENTE REPÚBLIKA KONA-BA
SOBERANIA**

Povu doben Timor-Leste!

Ita tama ona iha faze foun atu hametin ita-nia soberania, nu'udar estadu. Iha 20 Maiu 2002, ita restaura independénsia nasional hafoin luta libertasaun nasional durante tinan rua nulu resin haat. Iha 27 setembru 2002, comunidade internasional simu Timor-Leste nu'udar estadu-membru Nasoens Unidas nian.

Hafoin hetan rekofiesimentu internasional ba ita-nia independénsia, ita nia ukun-nain sira hahú preokupa ho kestaun soberania ba ita-nia tasi, **tuir direitu internasional**.

Biar ita ukun-an ona, ita seidak hatene ita-nia area tasi nian to'o iha ne'ebé. Nune'e, ita seidak iha soberania ka kbiit atu foti desizaun kona-ba ita-nia territóriu tomak tamba ita seidak hatene loloos fronteira-tasi no fronteira-rai, ne'ebé haketak ita, nu'udar pais, hosi rai viziñu rua: Australia no Indonézia.

Hare'e ba kbiit ne'ebé Konstituisaun Timor-Leste fó ba governu, VI Governu, liuhosi Rezolusaun n.4/2016, 9 fevereiru, nomeia negociador prinsipal atu lidera ekipa negosiasaun ho Indonézia no Austrália atu hamosu tratadu ida ba fronteira tasi. Tuir Rezolusaun ne'e, negociador prinsipal mak irmaun Kay Rala Xanana Gusmao, ikus mai, bolu Xefe Ekipa negosiasaun ba fronteira maritima permanente ho Indonézia no Austrália.

Iha agosto 2015, Indonézia hatán halo negosiasaun direta ho Timor-Leste kona-ba fronteira tasi nian.

Ho Austrália, prosesu la'o oinseluk, tuir Konvensaun Internasional kona-ba direitu ba tasi. Solusaun seluk mak hand prosesu konsiliaaun obrigatória. Prosesu ne'e hahú iha abril 2016. Timor-Leste mak rai primeiru foti desizaun tuir prosedimentu internasional ida ne'e atu hamosu negosiasaun kona-ba disputa kona-ba fronteira tasi.

Prosesu Konsiliaaun ida ne' e susar tebes. Biar nune'e, irmaun Xanana hatudu lideransa matenek, dedikasaun no determinasaun maka'as atu hamosu duni tratadu ida kona-ba fronteira-tasi entre Timor-Leste no Australia, iha tasi-mane.

Tanba negosiasaun ida ne'e ko'alia kona-ba soberania Timor-Leste nian, interese nasional ida, **ha'u, nu'udar Xefe Estadu, hakarak fó ha'u-nia apoiu maka'as no oinsá de'it, ba Governu Timor-Leste, liuhosi irmaun Xanana Gusmao ne'ebé kontinua lidera nafatin negosiasaun ne'e to'o hetan rezultadu ida ne'ebé justu mai ita, tuir direitu internasional**.

Prezidente Repúblika dejeza susesu ba Negociador-Xefe, irmaun Xanana Gusmao no ninia ekipa tomak, ne'ebé haka'as-an atu ita hotu bele manán dezafiu foun ida ne'e.

Hare'e ba direitu internasional, ha'u fear katak loron ida ita sei hatene loloos sá área-tasi no área-rai mak sei halo parte ita-nia territóriu nasional. Ita sei manan ita nia soberania ba territóriu Timor-Leste tomak, hosi rai ulun to'o rai ikun, hosi tasi feto to'o tasi mane.

Orgaun soberanu estadu Timor-Leste nian, instituisaun pública ka privada, inklui FALINTIL-FDTL no PNTL, sei haka'as-an nafatin atu defende soberania, paz no estabilidade ho apoiu povu tomak nian.

Ida ne'e dezafiu ida tan ba ita hotu maibé ha'u fiar ita sei hakat dezafiu ida ne'e!

Dili, 21 Agostu 2017